



FASNACHTSCLIQUE
JUNTERESSLI

Heb kai Angscht, du Trottel!

S isch dunggel duss und d Nacht fällt aabe,
E liichte Tschuuder, Ahnig numme,
Me hört dr Holzboggkäfer schaabe...
E Gefühl, me kas nit gnau begryffe,
E kalte Huuch vo Angscht goht umme.
Worum das Gefühl? Me weiss nit rächt,
S git die wo lut föhn afo pfyffe,
De-n-andere schloht's ufs Sunnegflächt.
Das Gefühl erschynt in viele Gschalte:
Dr Wolf mit grosse Zehn isch eini,
S isch wenig draa zum sich dra halte,
Derfür e Huffe Emozione.
Au Viire eigne sich, so kleini,
Und über alle Variante droone:
Dr Burka Schleier, s Minarett.
Ganz perseenlig und drum wohr
Erschynt das Gefühl; aber komplett
Isch's erscht wenn alli s gliiche glaube,
Erscht denn wird d Angscht zur grosse Gfohr.

E Gloon wo eim dr Schlof ka raube,
Mit blond verstrubbleter Perügge,
Dä sammlet d Ängscht wo ummeluure,
Zum se mit böse Find bestügge:
So sin si ryf für d Bolitigg.
Si Lösig: Gfängnis, langi Muure,
S wird liege wider schygg.
S git vyl vo däre Sorte Gloon,
Wo Gsetz und Regle dien verachte,
Z Europa ghörts zum guete Doon.
Au in dr Schwyz sin mir nit gschiider,
Wenn mir uns sälber gnau betrachte,
Und kuum e Rotschlag bringt ys wytter.
Wenn d SVP mit Geissbogg Zottel
S Land umpflüegt. Denn luttet leider
D Devise: „Heb kai Angscht, du Trottel!“

Das Gefühl, vo Glöön als Mummieschanz,
Versteggt in immer neue Kleider,
Verliert eso die ganz Brisanz.
Erscht wenn am Gloon si Nase fäählt
Denn merksch in welli Richtig s goht.
Si stoht am Abgrund unseri Wält!
Kei Frog vo Wölf und Minarette.
Agsichts vo däm wo hütte droht,
Könnt ys „Heb Angscht, du Trottel!“ rette.
Wenn s Gefühl sich mitem Dängge bindet,
Me wohrnimmt was um uns passiert,
Isch s nit eso dass d Angscht verschwindet,
Uns aber handligsfähig macht,
Bevor sich alli d Köpf yschlöhn
Wäge däne Glöön.
Bebbi, sunscht guet Nacht!

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sin vom Määntig znacht bis am Mittwuch demoorge! Deert und an de 3 Verkaufsständ (CINS) in dr Stadt ka men au alli Zeedel und Schnitzelbängg, d Blaggedde und dr Rädäbäng kaufe.

Am Fritig und Samschtig, 10. und 11. März 2017 isch Noochwuggswärbig vo dr 1. Lektion im Zält uff em Barfi.

D'Zeedellääsete isch am Sunntig noo dr Fasnacht 2017 am 12. Meerz vom Fimfi bis am Siibeni zoobe, in dr Baseldytschi Bihni (im Lohnhof). Dr Ytritt isch vergääbe. D Foyer-Bar isch vom Vieri ewäg offe.